

UTHM rai pelajar autisme

BATU PAHAT 12 April - Universiti Tun Hussien Onn Malaysia (UTHM) menganjurkan program khas bagi meraikan pelajar-pelajar autisme dari Sekolah Menengah Tun Ismail, Parit Raja sempena sambutan Hari Kesedaran Autisme di kampus universiti itu di sini baru-baru ini.

Pegawai Perhubungan Awam UTHM, Shafry Salim berkata, penganjuran program itu adalah sebahagian usaha pihak universiti memenuhi tanggungjawab sosial korporat terhadap golongan kurang bernasib baik itu.

“Program juga bertujuan meningkatkan keprihatinan warga UTHM terhadap potensi golongan autisme untuk turut menjadi modal insan cemerlang,” katanya dalam kenyataan baru-baru ini.

Penolong Naib Canselor Hubungan Industri dan Masyarakat, Prof. Dr. Jailani Md. Yunos merasmikan program itu yang diadakan di Dewan 3, UTHM.

Turut hadir Dekan Pusat Pembangunan dan Pengembangan Pelajar (PPPP), Prof. Madya Dr. Asri Amat dan Pengarah Jabatan

Kaunseling dan Kerjaya (JKK), Prof. Madya Dr. Ahmad Esa.

Pelajar-pelajar autisme dijemput sebagai tetamu dan antara aktiviti yang dijalankan adalah sesi ceramah dan perkongsian pengalaman.

Shafry berkata, sesi perkongsian pengalaman itu melibatkan pihak yang terlibat secara langsung atau tidak langsung dengan golongan autisme, bagi membolehkan warga UTHM memahami lebih dekat kaedah penjagaan golongan tersebut.

“Aktiviti ceramah pula disampaikan oleh pakar autisme membolehkan warga UTHM lebih memahami insan istimewa tersebut,” katanya.

Menurut Shafry, PPPP yang dipertanggungjawabkan sebagai sekretariat program juga melancarkan Tabung Derma Pelajar Autisme 2011 dengan kutipan derma dikendalikan pelajar-pelajar Kelab Kaunseling dan Kerjaya (KKDK) UTHM.

Kedua-duanya bertujuan sebagai kempen dan mesej bergerak kepada warga kampus terhadap Hari Kesedaran Autisme 2011 yang disambut buat kali keempat pada tahun ini di seluruh dunia.



BEBERAPA pelajar autisme berdiri di depan kain rentang sambutan Hari Kesedaran Autisme di UTHM, Batu Pahat, baru-baru ini.